

Na osnovu člana 2.12 stav (5) Izbornog zakona Bosne i Hercegovine („Službeni glasnik BiH“, broj: 23/01, 07/02, 09/02, 20/02, 25/02, 4/04, 20/04, 25/05, 52/05, 65/05, 77/05, 11/06, 24/06, 32/07, 33/08, 37/08, 32/10, 18/13, 7/14, 31/16, 41/20, 38/22, 51/22 i 67/22), člana 7. Uputstva o utvrđivanju kvalifikacija, broju, imenovanju, obuci i razrješenju članova izborne komisije osnovne izborne jedinice u Bosni i Hercegovini ("Službeni glasnik BiH", br. 67/21, 73/21, 1/22 - prečišćeni tekst i 13/22) i člana 21. tačka 18) Statuta Grada Zenica („Službene novine Grada Zenica“, broj 5/15), Gradsko vijeće Zenica, na \_\_\_\_ sjednici održanoj \_\_\_\_\_ godine, donijelo je

**ODLUKU**

**o objavljivanju Javnog oglasa za imenovanje pet članova Gradske izborne komisije Zenica**

**Član 1.**

Ovom Odlukom određuje se objavljivanje Javnog oglasa, postupak i kriteriji za imenovanje pet članova Gradske izborne komisije Zenica.

Sastavni dio ove Odluke je tekst Javnog oglasa za imenovanje pet članova Gradske izborne komisije Zenica.

**Član 2.**

Pet članova Gradske izborne komisije Zenica imenuju se na mandatni period od 7 (sedam) godina.

**Član 3.**

Kandidat za člana Gradske izborne komisije, u skladu sa članom 2.2 Izbornog zakona BiH, mora ispunjavati sljedeće opće uslove:

- a) da ima pravo glasa;
- b) da ima odgovarajuću stručnu spremu.

Pored navedenih općih uvjeta, kandidat mora ispunjavati i posebne uvjete:

- a) da ima prebivalište na području grada Zenica;
- b) da ima završen fakultet, VII/1 stepen stručne spreme ili završen fakultet Bolonjskog sistema studiranja sa najmanje 180 ETCS;
- c) da posjeduje iskustvo u provođenju izbora.

Pod iskustvom u provođenju izbora podrazumijeva se:

- a) članstvo u izbornoj komisiji;
- b) članstvo u biračkom odboru na izborima obuhvaćenim Izbornim zakonom BiH.

**Član 4.**

Za člana Gradske izborne komisije ne može biti imenovana osoba:

- a) koja se ne može kandidovati u smislu odredbi članova 1.6, 1.7 i 1.7a Izbornog zakona BiH;

- b) koja je član najvišeg izvršno-političkog organa političke stranke ili koalicije (predsjednik, potpredsjednik, generalni sekretar, sekretar ili član izvršnog odbora ili glavnog odbora);
- c) koja je nosilac izabranog mandata ili je član izvršnog organa vlasti, osim u slučajevima predviđenim članom 2.12 stav (4) Izbornog zakona BiH;
- d) koja je kandidat za izbore za bilo koji nivo vlasti;
- e) kojoj je izrečena kazna za radnju koja predstavlja težu povredu Izbornog zakona ili propisa za koju je lično odgovorna, u posljednje četiri godine, računajući od dana pravosnažnosti odluke.

#### Član 5.

Za sprovođenje postupka po ovom javnom oglasu određuje se Komisija za izbor i imenovanja.

#### Član 6.

Komisija iz člana 5. ove Odluke je obavezna:

- provesti postupak oglašavanja;
- po zatvaranju Javnog oglasa izvršiti klasifikaciju kandidata na kandidate koji ispunjavaju uslove tražene Javnim oglasom i na kandidate koji ne ispunjavaju uslove, te sačiniti zapisnik;
- obavijestiti pisanim putem sve prijavljene kandidate o rezultatima izvršene klasifikacije;
- sa kandidatima koji ispunjavaju uslove Javnog oglasa obaviti intervju, te sačiniti zapisnik;
- izvršiti konačno bodovanje kandidata po osnovu: stručne spreme, naučnog zvanja, izbornog iskustva i uspjeha postignutog na intervjuu, te sačiniti rang-listu sa redoslijedom kandidata prema uspjehu (ukupnom broju osvojenih bodova);
- podnijeti pisani izvještaj Gradskom vijeću o provedenom postupku kvalifikacije kandidata i prijedlog rang-liste.

Gradsko vijeće Zenica, cijeneći položaj kandidata na listi, donosi odluku o imenovanju pet članova Gradske izborne komisije Zenica.

#### Član 7.

Javni oglas za imenovanje pet članova Gradske izborne komisije Zenica bit će objavljen u dnevnom listu „Oslobođenje“, na web stranici Grada Zenica ([www.zenica.ba](http://www.zenica.ba)) i oglasnoj ploči Grada Zenica.

Javni oglas iz stava 1. ovog člana ostat će otvoren 8 (osam) dana od dana objavljivanja u dnevnom listu „Oslobođenje“.

#### Član 8.

Za stručnu i tehničku podršku Komisiji zadužuje se Stručna služba Gradskog vijeća.

#### Član 9.

Ova Odluka stupa na snagu danom donošenja, a naknadno će biti objavljena u „Službenim novinama Grada Zenica“.

Broj:  
Zenica,

PREDSJEDAVAJUĆI  
GRADSKOG VIJEĆA  
Mirza Husetić

BOSNA I HERCEGOVINA  
FEDERACIJA BOSNE I HERCEGOVINE  
ZENIČKO- DOBOJSKI KANTON  
GRAD ZENICA  
GRADSKO VIJEĆE

Na osnovu člana 2.12 st. (5) Izbornog zakona Bosne i Hercegovine („Službeni glasnik BiH“, broj: 23/01, 07/02, 09/02, 20/02, 25/02, 04/04, 20/04, 25/05, 52/05, 65/05, 77/05, 11/06, 24/06, 32/07, 33/08, 37/08, 32/10, 18/13, 7/14, 31/16, 41/20, 38/22, 51/22 i 67/22), člana 7. Uputstva o utvrđivanju kvalifikacija, broju, imenovanju, obuci i razrješenju članova izborne komisije osnovne izborne jedinice u Bosni i Hercegovini („Službeni glasnik BiH“, br. 67/21, 73/21, 1/22 - prečišćeni tekst i 13/22) i člana 1. Odluke o objavljivanju Javnog oglasa za imenovanje pet članova Gradske izborne komisije Zenica („Službene novine Grada Zenica“, broj \_\_\_\_\_), Gradsko vijeće Zenica objavljuje

**JAVNI OGLAS**  
**za imenovanje pet članova Gradske izborne komisije Zenica**

**I**

Objavljuje se Javni oglas za imenovanje pet članova Gradske izborne komisije Zenica. Člana Gradske izborne komisije imenuje Gradsko vijeće Zenica, uz saglasnost Centralne izborne komisije Bosne i Hercegovine na period od 7 (sedam) godina, od dana davanja saglasnosti Centralne izborne komisije BiH.

Kandidat za člana Gradske izborne komisije treba ispunjavati sljedeće opće uslove:

1. da je osoba sa pravom glasa;
2. da je osoba sa odgovarajućom stručnom spremom.

**II**

- (1) Pored uslova iz tačke I ovog oglasa, osoba koja je kandidat za člana Gradske izborne komisije mora ispunjavati sljedeće posebne uslove:
  - a) da ima prebivalište na području grada Zenica;
  - b) da ima završen fakultet, VII/1 stepen stručne spreme ili završen fakultet Bolonjskog sistema studiranja sa najmanje 180 ETCS i
  - c) da posjeduje iskustvo u provođenju izbora.
- (2) Pod iskustvom u provođenju izbora podrazumijeva se:
  - a) članstvo u izbornoj komisiji i
  - b) članstvo u biračkom odboru na izborima obuhvaćenim Izbornim zakonom BiH.

**III**

- (1) Sastav Gradske izborne komisije mora biti multietničan tako da odražava zastupljenost konstitutivnih naroda, uključujući i ostale vodeći računa o posljednjem popisu stanovništva provedenom na državnom nivou.
- (2) U sastavu izborne komisije nastojace se obezbijediti zastupljenost spolova u skladu sa odredbom čl. 2.14 st. (1) Izbornog zakona Bosne i Hercegovine.

**IV**

U skladu sa članom 2.3 Izbornog zakona BiH, za člana Gradske izborne komisije ne može biti imenovana osoba:

1. koja se ne može kandidirati u smislu odredbi članova 1.6, 1.7 i 1.7a Izbornog zakona BiH;
2. koja je član najvišeg izvršno-političkog organa političke stranke ili koalicije (predsjednik, potpredsjednik, generalni sekretar, sekretar ili član izvršnog odbora ili glavnog odbora);
3. koja je nosilac izabranog mandata ili je član izvršnog organa vlasti, osim u slučajevima predviđenim članom 2.12 stav (4) Izbornog zakona BiH;
4. koja je kandidat za izbore za bilo koji nivo vlasti;
5. kojoj je izrečena kazna za radnju koja predstavlja težu povredu Izbornog zakona ili propisa za koju je lično odgovorna, u posljednje četiri godine, računajući od dana pravosnažnosti odluke.

## V

Član Gradske izborne komisije ne može biti zastupnik, odnosno punomoćnik političkog subjekta koji učestvuje na izborima, niti lice koje je pravosnažnom sudskom presudom osuđeno na kaznu zatvora u trajanju od šest mjeseci ili duže.

## VI

Uz svojeručno potpisanu prijavu na Javni oglas, koja sadrži kontakt podatke podnosioca prijave i listu priloženih dokumenata, potrebno je dostaviti sljedeću dokumentaciju:

1. kraću biografiju;
2. ovjerenu kopiju diplome o stečenoj stručnoj spremi kandidata, nostrifikovanu-priznatu diplomu ukoliko fakultet nije završen u Bosni i Hercegovini, uključujući i diplome stečene nakon 06.04.1992. godine, u nekoj od država nastalih raspadom SFRJ, a u skladu sa propisima nadležnog organa koji vrši nostrifikaciju-priznavanje inostranih diploma;
3. dokaz o posjedovanju iskustva kandidata u provođenju izbora, koji mora sadržavati podatke o nazivu izborne komisije i mandatnom periodu, odnosno vrsti i godini izbora i nazivu biračkog mjesta, u kojem je imenovani kandidat bio član biračkog odbora, te podatak da je imenovani kandidat bio angažovan u radu biračkog odbora i obavljao ovu dužnost;
4. dokaz o naučnom zvanju i/ili položenom pravosudnom ispitu i/ili o nosiocu pravosudne funkcije i/ili prisustvu obukama u organizaciji Centralne izborne komisije BiH - jednoj ili više obuka (ukoliko kandidat posjeduje navedeno);
5. ovjerenu fotokopiju lične karte;
6. dokaz o prebivalištu kandidata (obrazac PBA-3), ne stariji od tri mjeseca od dana izdavanja od nadležnog organa;
7. svojeručno potpisanu i od nadležnog organa ovjerenu izjavu o nepostojanju smetnji iz tačke IV ovog javnog oglasa (član 2.3 Izbornog zakona BiH) - (Prilog 5 Uputstva o utvrđivanju kvalifikacija, broju, imenovanju, obuci i razrješenju članova izborne komisije osnovne izborne jedinice u Bosni i Hercegovini);
8. izjavu o nacionalnom izjašnjenju, svojeručno potpisanu i ovjerenu od nadležnog organa, koja obavezno sadrži tekst „sa posljednjeg popisa stanovništva u Bosni i Hercegovini“;
9. svojeručno potpisanu i od nadležnog organa ovjerenu izjavu o nepostojanju smetnji iz tačke V ovog javnog oglasa (član 2.12 stav (7) Izbornog zakona BiH), odnosno da osoba koja je kandidat za člana gradske izborne komisije nije zastupnik, odnosno punomoćnik političkog subjekta koji učestvuje na izborima, niti lice koje je pravosnažnom sudskom presudom osuđeno na kaznu zatvora u trajanju od šest mjeseci i duže.

## VII

Ovaj javni oglas bit će objavljen u dnevnom listu „Oslobođenje“, na web stranici Grada Zenica ([www.zenica.ba](http://www.zenica.ba)) i oglasnoj ploči Grada Zenica.

Dokumenti koji se prilažu uz prijavu moraju biti originali ili ovjerene kopije.

Rok za podnošenje prijava je 8 dana od dana objave u dnevnom listu „Oslobođenje“.

Prijavu na ovaj javni oglas dostaviti preporučeno poštom, ili na protokol Grada, u zatvorenoj koverti sa naznakom:

**„JAVNI OGLAS ZA IMENOVANJE PET ČLANOVA GRADSKJE IZBORNE  
KOMISIJE ZENICA – NE OTVARAJ“**

na sljedeću adresu:

**GRAD ZENICA  
KOMISIJA ZA IZBOR I IMENOVANJA  
Trg BiH br 6, 72 000 Zenica**

Komisija će obaviti intervju, nakon čega će sačiniti rang-listu sa redoslijedom kandidata prema uspjehu (ukupnom broju bodova) i istu dostaviti Gradskom vijeću.

Nepotpune i neblagovremene prijave neće biti razmatrane.

Predsjedavajući  
Gradskog vijeća Zenica

Mirza Husetić